

Dia Internacional di Idioma Materno dedica na nos docentenan di Papiamento cu un simposio exitoso



ORANJESTAD (AAN): Na ocasion di Dia di Idioma Materno, dia 21 di februari, Ministerio di Enseñansa, Ciencia y Desaroyo Sostenibel, den cooperacion cu Fundacion Lanta Papiamento, a dedica e aña aki extra atencion na nos cuerpo di docente di Papiamento y na e studiantenan di Bachelor Papiamento di IPA.

Fundacion Lanta Papiamento a organiza, specialmente dirigi riba e grupo menciona, un mini-simposio cu hopi informacion importante relaciona cu desaroyo di innovacion di nos enseñansa na Aruba, den cual Papiamento, carga pa nos docentenan di Papiamento, tin un papel importante.

E docentenan di Papiamento trahando na diferente school secundario a haya dispensacion di Inspectoria pa participa na e simposio aki.


Señora Selvia Lumenier, docente di Papiamento y ganador di e competencia Poeta di Patria 2015 a habri

e dia cu algun di su bunita poemanan.

Apertura oficial tabata den man di Minister di Enseñansa, Ciencia y Desaroyo Sostenibel Dr. Lampe cu a anuncia e acuerdo di cooperacion entre Aruba, Corsou y Boneiro relaciona cu Papiamento cu nan a caba di firma na Boneiro.

Minister di Cultura, Mr. R. Ruiz-Maduro, a trata e tema di UNESCO pa aña 2019.

Den e programa, cu tabata profesionalmente guia pa e Maestra di Ceremonia Señora Shirley Angela-Eisden, tabatin orador di Puerto Rico, Corsou y Aruba y nan a trata e siguiente topiconan:



Presidente di Fundacion Lanta Papiamento Eduard Pieters: Cuido di Docente; Drs. Merlynn Williams y drs. Régine Croes: Proyecto school Multilingual & school Arubano Multilin-



gual; Director di Colegio San Antonio Gershwin Lee: E alumno di Proyecto school Multilingual den school Secundario;

Director di School Secundario na Papiamento na Corsou Señor Eugène Jansen: E Rol di Papiamento y Relacion entre Papiamento y Ingles den SKAIH na Corsou;

Gregory Goedgefrag: Estudio Papiamento Bachelor na IPA;

Prof. Dr. Nicholas Faraclas di Puerto Rico: E condicionnan pa un implementacion exitoso di innovacion;

Dr. Joyce Pereira: Promocion como parti importante di Maneho y Planificacion di Idioma.

Un programa yen, interesante y hopi informativo cu a dura di 08.00 te 15.00 or. Tabatin hopi posibilidad pa intercambio di idea.

Loke a resalta den tur e presentacionnan ta e desaroyo positivo di Papiamento, tanto den comunidad, como den enseñansa. Tin hopi obstaculo ainda den caminda, pero por mira tambe cu e motivacion pa duna Papiamento su espacio mereci, pa reconoce Papiamento como nos idioma nacional y idioma clave den enseñansa, ta creciendo.

Un resolucion importante ta cu tin escasez di docente di Papiamento y cu tin cu traha mas pronto posibel na un solucion structural p'e añanan venidero.


Tur hende cu a participa henter dia na e simposio a ricibi un certificado.

Tabata un siman yen di actividad den cuadro di desaroyo di Papiamento. Riba e dianan 18, 19 y 20 di februari Prof. Dr. Faraclas a ofrece diferente tayer na e studiantenan di Bachelor Papiamento di IPA tocante lenga crioyo y Papiamento y nan uzo den enseñansa. Tambe el a reuni cu e team di investigacion di school

Multilingual y e team di idioma di e Centro pa Desaroyo Profesional y Continuo (CDPC) di IPA pa scucha tocante e plan- y proyecto- nan andando y duna consejo riba esakinan.

Ta obvio cu informacion y intercambio continuo ta necesario pa laga tur hende realisa e balor grandi di nos idioma nacional Papiamento.

Fundacion Lanta Papiamen-



to ta gradici tur e oradornan pa nan contribucion valioso, e docentenan cu a participa, Minister di Enseñansa y Inspectoria cu a duna e docentenan e oportunidad pa participa, Biblioteca Nacional Aruba cu a pone su personal di seccion audiovisual y un bunita espacio di BNA na nos disposicion, Instituto Pedagogico Arubano pa su contribucion, Caribbean Mercantile Bank pa su sosten financiero y tambe e Circulo di Amigo di Fundacion Lanta Papiamento. Danki na boso tur e mini-simposio pa nos cuerpo di docente di Papiamento tabata un exito.